



## GO TSWA MO KANTORONG YA MMUSAKGOTLA

Kantoro ya mmusakgotla e neilwe maikarabelo a go ela tlhoko tsamaiso ya lekgotla la mmasepala. Nngwe ya maikarabelo a, ke go bona gore balekgotla go tsenyeletsa le bone bo meiyara ba ikarabela mo go iseng diterelo ko merafeng e e ba e emetseng. Molao wa bommassepala wa tsamaiso (Municipal Systems Act) o pateletsa bommassepala kgotsa o ba rwesa maikarabelo a go bona le go netefatsa gore go nna le botsaakarolo jo bo feletseng magareng ga mmasepala le baagi ka ga merero e e ba amang. Sekai, metsele-tsele ya lenaane le le kopanetsweng la ditlhabololo le tekanyetso-kabo le go tsenela dikopano tsa lekgotla jaaka baelathoko.

Ke rata go tsaya tshono eno go amela baagi ka se kantoro eno e ikaeletseng go se dira mo ngwageng e go ya ko pele. Erile mo ngwageng ono, bommusakgotla botlhe ba bommassepala ba sedika ba saena tumalano le kantoro ya Mosireletsi wa Setshaba (Public Protector) e ka yone e tlamang dikantoro tsa bommusakgotla go ikarabela ka botlalo kwa baaging mabapi le ditirelo le go netefatsa fa balekgotla ba tsenela dikopano tsa morafe, ka go itemogetswe gore balekgotla bangwe ga ba dire tiro ya bone. Go ya ka molawana wa puso-selegae o pateletsa gore bonnye go nne le dikopano tse nne mo ngwageng mme re ile ra fetola seo ra leka gore bogolo dikopano tseo di tsene kgwedi le kgwedi go begela baagi ka diphithlelelo tse re nnileng le tsone. Re sale foo, re tsweletse go rotloetsa batsaakarolo go dirisana le baagi ga mmogo le mekgatlo ya baagi jaaka di dumelelwa go ya ka molaotheo wa naga mme re tla netefatsa fa seo se tsenngwa tirisong ka botlalo.

Re ile ra tsaya maikano a gore re tla nna re tswelela go ema bommassepala ba rona ba selegae nokeng, gore baagi ba bone puso-selegae e e ikarabelang, e e naleng boleng le maemo a a tshwanetseng le go tefatsa fa badiredi ba ditlhabololo tsa baagi (CDW) ba dirisana mmogo le baagi le go re ba ba neele tshedimosetso yotlhe e e maleba. Ke maikarabelo a balekgotla ba kgoro (Ward Councillor) le badiredi ba ditlhabololo tsa baagi go tsaya dingongorego tsa baagi ba di isa ko mafapheng a a maleba, ga ese dingongora tsothe tse di lebaganeng bommassepala. Ke ka moo re ileng ra ipopa ngata e le nngwe le ditheo tsothe tsa karolo ya borobonngwe go lwantsha le go fedisa dikgwetlho tse di jaaka lehuma, botlhoka-tiro le go sa lekalekane.

Ntlha nngwe e re salaganeng le go e diragatsa, re le bommassepala ke go tswelela ka lenaane la go fetolela maina a bommassepala le ditheo tse dingwe tsa puso mo maineng a balwelakgololosego. Go tla nna le metseletsele ya go rotloetsa baagi go nna le seabe mo go tlotleng bagaka ba, seo e le ka maikaelelo a go diragatsa ditshwanelo tsa bone jaaka baagi.

Ke tle ke tseye gape tshono eno go leboga le go tlotlomatsa John Taolo Gaetsewe Developmental Trust le meepo mo go re emeng nokeng le go dira mmogo le rona, segolo bogolo jang kantoro ya Auditor General le Puso-selegae mo go thuseng dimmassepala mo go tliseng diphetogo le go netefatsa gore go thapiwa batho ba bal eng maleba. Jaaka Aferika Borwa e tlhopilwe mo kontinenteng ya Aferika jaaka nngwe ya dinaga tse di nna le ditlhabololo, mme John Taolo Gaetsewe e le yone e gola ka lobelo le le kwa godimo mme re sefolfela gore Spatial Development Framework e tla re thusa thata mo go go tliseng ditlhabolo, re nale leano la go bona gore re tsenya jang seo mo tirisong. Re boe gape re lebogele dikolo tsothe tsa mo sedikeng tse di bontshitseng fa di nale bokgoni jwa go bona go ntsha dipholo tse di nametsang mme le tsone tseo di sa dirang sentle re tla nna re tswelela go di tlhaga thuso le go di rotloetsa gore di tshegetse ka thata.

Kwa bokhutlong ke rata go raya baagi kere “re le puso ga mmogo le lekoko le le busang, re netefatsa baagi gore re tla tswelela go ba direla ka botswapelo ka bongwe fela jwa pelo”mme gape ke nople mafoko a mokwadi yo o tumileng ebong Amilcar Cabral mo nngweng ya dibuka tsa gagwe ebong “Tell no lies, claim no easy victories” fa a re “**Always bear in mind that the people are not fighting for ideas, for the things in anyone’s head. They are fighting to win material benefits, to live better and in peace, to see their lives go forward, to guarantee the future of their children.**

***Demand from responsible Party members that they dedicate themselves seriously to study, that they interest themselves in the things and problems of our daily life and struggle in their fundamental and essential aspect, and not simply in their appearance ... Learn from life, learn from our people; Learn from books, learn from the experience of others. Never stop learning.***

Go fitlhelela re kopana gape mo nakong e e tlang!!!